



懷念的山城——平溪

對臺北到平溪駛車差不多點外鐘，山路彎彎幹幹，一片是山、一片是溪。春天的時陣，兩片的櫻花開甲滿滿是；熱天油桐花滿山遍野，一陣風吹來若像咧落雪咧。一簇一簇的紅毛杜鵑共山坪染甲五花十色，實在誠迷人。

平溪是一个誠嬌的山城，遮的厝攏順溪仔邊的山坪起的，庄裡的路細條閣懸懸低低，有的所在誠狹，無法度相閃車，所以駛車的時愛先看頭前有車來無？若無，佇彼號山路倒退攏，毋是咧滾耍笑。遐真少跤踏車，出門若毋是怙行的，就是騎 oo-tóo-bái。平常時仔有較稀微淡薄仔，因為少年的攏出外去拍拚，厝裡賭老人佻囡仔，所以講遮是一个老人囡仔庄。

你若坐火車去平溪，菁桐坑是頭一站，這是炭空上濟的所在。這馬猶會當參觀舊磅空、炭礦博物館，會當了解當時炭工的生活，順繼參觀古早時代的老火車頭，閣會當共你的願望寫好掛踏車頭邊，向望後擺會當實現。日本時代捌佇彼个所在挖塗炭。台陽會社為著欲載塗炭造鐵枝路，平溪就按呢鬧熱起來，所以平溪人共塗炭號做「烏金」。

風對樹林內吹來有野花的芳味，山鳥 tsih-tsiuh 叫，草蜢仔的歌聲，遠遠的溪水聲，予人攏行袂開跤。若是拄著西北雨了後，田頭 khiaunh 佇田岸跤、佇溪溝仔墘，khiaunh、khiaunh、khiaunh 的叫聲，若像咧叫你愛閣來喔！熱天的暗暝，滿天的天星閃爍，滿四界的火金姑飛來飛去無閒頃頃，拄著一个天燈飛過，予山城的暗暝加誠神秘。

十分瀑布佇十分寮的山內，經過目鏡洞，行過吊橋就看著矣，這是臺灣上大的水沖，是一个有名的觀光區，歇睏日仔遊客密密是，尤其是少年囡仔上愛耍溪仔水、掠溪哥仔、撈蝦仔，規工都要袂瘡。

欲轉去順繼買兩把仔珠蔥佻一寡劍竹筍，這是平溪的山產。運氣若較好凡勢仔會買著野生的山藥薯，敢若像野生的參仔全款，你就福氣啦！

作者：洪振春

☆詞彙學習☆

【倒退攏】tò-thè-lu：倒退著挪動。

【滾耍笑】kún-sng-tshiò：開玩笑。

【怙】kōo：依靠、憑藉某種方式來達到目的。

【稀微】hi-bî：寂寞、寂寥。

【炭空】thuàn-khang：專門開採煤礦的礦坑。

【水沖】tsuí-tshiàng：瀑布。

【溪哥仔】khe-ko-á/khue-ko-á：溪哥。

【密密是】bàt-bàt-sī：密密麻麻。

【瘡】siān：疲倦、厭煩。

【參仔】sim-á：又唸作 sam-á、som-á。人參。